

東
潛
文
稿

東潛文稿卷下

仁和趙一清誠夫

楚莊王入陳非霸討論

先儒莫不許楚莊王之入陳殺夏徵舒以爲能行霸討矣
蓋諸侯不能討而楚討之故雖有縣陳之罪納孔寧儀行
父之非而皆得從末減以余觀之獨不謂然何也陳靈公
之弑也在魯宣公之十年夏四月癸巳逮十一年夏楚子
陳侯鄭伯盟于辰陵陳侯者靈公子成公午也是旣列于
會矣至冬十月楚人殺陳夏徵舒丁亥入陳納公孫寧儀
行父于陳左氏傳陳侯在晉蓋成公旣與楚盟而身又往
朝于晉是時楚莊方求霸于諸侯是以惡其貳而伐之特

託名有討于少西氏知陳人之不與也而徼其無動焉耳
既乘其虛而入其國遂有利陳之心因而縣之又懼成公
在晉晉人必助之復國而知陳之終未可取也適投申叔
之言用市復陳之美強納其邪臣以亂其國乃史記陳世
家云孔子讀史記至楚復陳曰賢哉楚莊輕千乘之國而
重一言不知夫子蓋心傷之而甚疾之何爲其賢之也春
秋筆削推見至隱紛紛以殺夏徵舒爲褒納寧儀爲貶忽
予忽奪聖人立萬世之經必不若是吾故曰楚莊之入陳
非霸討也蓋與晉爭霸耳孟子曰五霸假之也豈有真能
行討賊之事哉而王伯厚以爲春秋書楚子入陳不忍諸

夏見滅于蠻夷故書入焉猶未合春秋之旨矣

楚鬪宜申爲君討賊論

天下容有弑君之賊或緩其報於身至子孫始受報者矣

如司馬昭及五代以降皆是也

未有弑父之賊而不身被其誅者也

蔡般之逆

禍且及子後世如劉劭朱守珪之徒卽時誅滅

蓋父子天顯之親至於弑父天理

滅矣此真覆載不容無能逃乎天之刑也乃吾觀楚穆王

之弑成王心竊忿焉忿夫楚國之大無一人起而討之竟

獲保首領以沒而且莊其繼世爲之幹蠱而承考使人幾

忘其弑逆之迹夫子作春秋特書曰楚世子商臣弑其君

頽

事在文元年冬十月丁未

又曰楚殺其大夫宜申

事在文十年

宜申者子

西也傳曰楚范巫裔似謂成王與子玉子西皆將強死城

濮之役子西縊而懸絕後謀弑穆王見殺夫穆王也而猥
云弑乎哉子西與子玉同事成王成王弑而商臣偃然爲
君者且十年子西蓋謀之又久慎重而後發惜乎天不助
順而遽敗也春秋大其討賊故稱國以殺而不去其官而
杜預曰謀弑君故書名是不知君臣父子之倫而妄以私
說誣聖經也嗚呼商臣之惡已稔矣然則子西之忠必不
可沒矣此事公穀均未明其義左氏略具其事乃以巫言
實子西之當厄於兵義猶蒙耳吾故表而出之

吳蜀兵勢論一

或問三國時吳蜀用兵孰優曰蜀爲強吳不及也何以明其然也曰吳藉父兄之資據三州之地土廣而民富荊州形勢之區而吳得之長江舟楫之利而吳習之宜其易于得志乃西取石陽而不克東攻合肥而輒敗烏林之役乘曹公疲疫之衆藉先主犄角之力僅而勝之其譎曹休誘王凌專尚狡猾陰賊之謀曾無有堂堂正正虎爭中夏之心諸葛元遜東關之捷陸幼節西陵之剋差爲可稱然而新城再圍譟譟旋生步闡殄絕力已甚憊且淮南連歲舉兵挈地來歸曾不能救仲恭公休之滅亡又安望其上岸

一步哉若夫蜀則不然出軍興勢妙才授首矣水溢漢堤
于禁乞降矣馘張郃于青封摧王經于洮水茲數子者皆
魏之名將重臣而蜀殺之如腐鼠驅之如羣羊武侯一出
三郡響應隴右震動陰平武都割其要害魏人切切焉欲
得一當以報之真爽父子相繼大興子午駱谷之師然竟
于蜀絲毫無損也以司馬懿之通達奇變猶尚難之況乎
其下者哉曰然則蜀何以屢屈于吳也曰荊州之失用人
之過也呂蒙潛師掩襲向使非麋芳士仁潘濬三叛則荆
州之城終不可攻也堅城在前勝兵在後蒙適成擒耳秭
歸蹉跎所謂憤兵伯言亦惴惴乎懼之向使永安之運數

猶長猱亭之覆師必復寧可執此二端遽定其優劣哉然則蜀何以先亡也曰此由後主誤聽賊臣邪說而不念其國家也於時閣道雖已入平縣竹縱然喪旅然姜維張翼方乘其隙霍弋羅憲各保一方成都殷實可以固守南中險惡猶足支持是以鍾會將議退師鄧艾幸而獲濟齟齬譙周妄談天命冀倖生封驢車旣具砍石徒悲昔人有云禪旣庸主周亦驚臣夫豈用兵之罪哉吾故謂先主之忠才大略與仲謀之甘心屈辱純任詐力不同而武侯之忠誠亦非區區呂子明陸伯言輩所能庶幾也

...

...

...

...

...

...

...

...

...

...

...

...

吳蜀兵勢論二

敢問吳之所由弱有說乎曰有之吳以得荊州而雄亦以取荊州而弱當關公之圍襄樊也降于禁虜龐德曹仁將委城而去之徐晃陷圍而不解吳人倘克全信義以終赤壁之功出兵淮南協力同規一舉而曹氏可破也中原可圖也計不出此貪近功而忘遠略甘小利而隳大義開兩家之兵端成子桓之篡奪已而屈膝稱藩責質請貢乍前乍卻首尾狼狽誰之咎哉則呂蒙生覺邀功之故也夫蒙但爲權割據一方竊號自娛計則忠矣如欲使權上之扶翼漢鼎志匡王室次之決機行陣與天下爭衡彼周公瑾

魯子敬何人哉兵法云名其爲賊敵乃可服焉有折節稱
臣尋又叛之名不正則言不順言不順則事不成士氣不
揚國威已損無惑乎屢出而屢衄也及權晚謬失策遼東
燕王九錫之命以己所受之魏爲吳王者回授公孫淵思
一雪其內疚橫遭猾虜受侮不少氣湧如山益形其醜何
如先主孔明正名定分刻不與賊俱生羣下曉然咸喻其
有吞滅當塗之志當建興之初魏臣華歆王朗陳羣之屬
與諸葛書陳天命人事欲使內附武侯不答作正論以絕
之是故屢耀其兵而不悔雖當敗績而能自振較之張子
布僅知卻邗貞之傲而忘受封之恥度量相越豈可以道

里計哉抑吾觀之非獨權之多詐也孫氏自堅起兵長沙
過殺張咨王叡依附袁術受其嗾指遠攻劉表以喪厥身
策亦受命于術覩其將敗始示攜貳渡江而東攻城屠邑
追逐王臣許貢表稱其驍雄似項籍若放於外必作世患
揆之正道則江表劇盜等耳烏足數哉烏足數哉

吳蜀兵勢論三

且夫蜀之強不自武侯始也襄樊之圍曹公竭數州之力以禦之曹仁呂常受圍於內于禁七軍見虜於外七軍者張遼張郃朱靈李典路招馮禮與禁所督而爲七也先是赤壁之敗曹公北歸畱七將軍軍以備敵其後遼等徙屯令禁并將之而以朱靈爲部下督蓋如是其重也禁軍覆沒許下震驚梁郟陸渾羣盜遙受壯繆印號爲之支黨如侯音孫狼等是已蔣濟謂彼時有徙都渡河之計于是曹公遣徐晃助仁而別遣將軍呂建徐商殷署朱蓋十二營咸詣晃所又召裴潛于鄆城取張遼于合肥而身自出摩

東漢書卷一百一
一
陂爲之聲援圍不卽解諸將呵責晃賴趙儼護軍爲晃畫
策得與仁消息并勢大戰而後退然而曹公固已東西疲
于奔命矣觀陸機弔魏武文正以建安三八之年漢中失
守軍將敗亡鬱鬱不逞返旆秦川猶未息駕襄陽告急纂
嚴還救倉皇登頓遂至薨殂非先主君臣殺之而孰殺之
哉況乎武侯收南中之資并羌叟之力北通軻比東結孫
吳虎視龍驤自來自去而曾莫之誰何也嗚呼蜀之爲蜀
亦勁矣哉